


鎌山草堂詩合鈔
王閣 贖稿





叢書集成



商務印書館發行

鑱山草堂詩合鈔



王光承纂

鍊山草堂詩合鈔

本館據藝海珠塵
本排印初編各叢
書僅有此本

鎌山草堂詩合鈔卷上

王光承光承字玠右江南華亭縣南橋鎮人今分隸南匯以隱逸徵不起無後著述散失幾盡與弟烈耦耕上海縣之石符里

古樂府鏡歌十八首

朱鷺

朱鷺合沓來集王庭。梁有魚石粼粼。鷺在梁。鶴在野。手持諫書立鼓下。

思悲翁

思悲翁取彼竹實食鳳凰。腰如弓首如蓬。鳳凰信鷓臯。奪我美人枳棘中。思悲翁。臯母將臯子。拉沓高飛隨春風。

艾如張

艾而張羅羅且長。山有雀。煩其黃。幡玃飛常羊。朝獲狐。暮獲烏。雀獨高飛柰雀何。嗟彼虞人伏四野。視眈眈。伊優亞。訾雀其何不徠下。

上之回

上之回。龍紛員。武騎十八萬。馳長風。齎浮雲。單于來上朝服。兩月支。稱屬國。羣臣受計朝甘泉。福祿如茨

國家圖書館



002570840

億萬年。

翁離

擁離趾中可築室。何以葺之蓬與篳。冬之風。夏之日。霜雪爭出入。東方高。自偃息。

戰城南

戰城南。轉城北。鬪深日落沙場黑。我爲客豪。見敵安可奔。戰死復何葬。野烏之腹爲我墳。水深茫茫。蒲葦芄芄。梟騎委黃沙。駑馬躑躅春草中。縣北第。賜君居。君不識。賜田千頃。君不食。願爲駑馬。駑馬安可爲。願爲梟騎。梟騎戰不歸。傷子良臣。白骨離離。

巫山高

巫山高。生悲風。淮水深。生蛟龍。步道斷絕。船道不通。去家千里。何時東歸。匪鶉匪鳶。身重不飛。日月自明。山川自長。遠道之人心茫茫。

上陵

上陵何高高。下津何湯湯。問客從何來。自言水一方。陽侯佐刺船。馮夷爲權郎。鮫人榜且歌。朝暮瀟與湘。西盡三巴東。鉅野鴻雁隨山林。載飛載下。曾不知天地之大。神山之宮。光澤何歷錄。鳳爲驂。麟爲服。櫛瀛洲。沐陽谷。往來銅池中。芝露皆五色。環坐吹簫笙。萬年壽無極。

將進酒

將進酒。獻重觴。樂嘉賓。拔蘭堂。露夜零。流華光。歌以侑之。雲翔翔。羅千童。紛以歌。東方未明。柰子何。君馬黃。臣馬駢。二馬齊驅。金爵門。兄事歸風。弟浮雲。賁父駕以東。馬驚車敗。傷哉思美人。造父駕以西。經流沙。涉無草。勤民之力。而有醉飽之心。

君馬黃

芳樹

芳樹何鬱鬱。上有黃鵠徘徊飛。黃鵠鞠爲裳。芳樹生光輝。秋風沓颯吹。樹枝黃鵠不可留。哀鳴遠行遊。芳樹與爾秋風亦何仇。吹我枝葉離哉紛。吹我黃鵠散其羣。妬人之人何得焉。舍旃舍旃亦無然。

有所思

有所思。乃在隴坂西。走龍雲。鳳錦。乘月裁君衣。日夜望君來。再拜獻遺之。君有他心。涕泣燒其衣。登高山。揚其灰。呼君名。告天地。天地當知之。君從右來我鄉左。君有他心。罪不在我。雞鳴狗吠。兄嫂披衣出。東方漸高。日漸白。看君白日何顏色。

雉子班

雉子班。飛以旋。雉母五。雉子六。雄來從之。乃在南山崑石間。無以我翁孺驚雉子。踴踴不可止。黃鵠極高。摩天飛。歸來從雌。顧其子。王孫有羅鵠。有雉。艾而張羅。鵠千里。

聖人出

聖人出。紛四海。芝爲車。雲爲蓋。美人來。思遠遊。秋秋踰踰。遨九州。神農虞夏不可求。

上邪

上邪逢君來。合歡無絕衰。千秋萬歲亦誠哉。天柱折。地維缺。東方無日。西無月。與君終不絕。

臨高臺

臨高臺。水之湄。下有江。籬間。菴蕘。登高望遠君不知。黃鶴離哉。亂清池。我欲關弓射黃鶴。黃鶴去。水不飛。壽萬年。翔吉時。

遠如期

遠如期。福以介。大莫大。山如礪。長莫長。河如帶。匈奴三萬人。稽顙稱臣。奏雅樂。聲陰陰。單于捧觴震澹心。謁者贊引。左右賢王。羅拜闕庭。漢天子。萬年延壽命。

石流

石流如此之離離。清泉東逝。黃鶴西飛。朝暮各異方。石在山之溪。石有蘭兮。蘭有香。願以佩之。阻且長。使我佳人永相望。

襄陽蹋銅蹄

襄陽白銅蹄。玉勒黃金羈。馬前何纍纍。揚州遊冶兒。官從襄陽來。最愛襄陽馬。金刀美少年。承恩雙闕下。

前年下揚州。牽衣南陌頭。無將舊人意。朝朝對暮愁。

女兒子

漁陽古道日光低。欲落不落上人衣。只慣蓮舟不慣馬。髻墮腰環雙淚下。

黃督

陌頭諸年少。春風散馬羣。傾壺花下飲。不顧他鄉人。求寄故人車。催牛伴不語。前年大隄頭。我亦曾載汝。

楊柳枝

旗亭十里送春思。盡向楊枝訴別離。天南天北無窮恨。壓得長條著地垂。幾家曲室合歡時。幾處長亭送別離。歡時不見栽楊柳。臨別人人來折枝。

五言古詩

雜詩十一首

秋蘭何冉冉。結根湘水濱。驚飄忽已至。吹我燕山陰。燕山非故鄉。獨行嘗畏人。沉沉白日暮。歌鐘起四鄰。侯家良宴會。簫管浮春雲。笙歌日以好。天地日以老。悲風西北來。蕭蕭寒百草。棄置何足傷。所傷在遠道。

長歌曲變音。久客人變心。越鳥巢北山。悠悠忘故林。青樓多好女。顧盼輕千金。飛觴沈白晝。歌舞一何深。我有鴛鴦綺。裁爲合歡被。萬里寄君前。棄之如敝屣。聚散各有時。悲泣亦何爲。願君長歡樂。享此黃髮期。長安遊俠客。乘時附青雲。賜第連平樂。出入見威神。蒼頭貫甲冑。門巷比重闈。公卿通請謁。曲室始延賓。主人盛意氣。上客皆逡巡。徐願開華筵。水陸難具陳。羣倡同春草。供御有王孫。酒酣衆樂作。投壺間六博。盼矚冬枝榮。薄怒春華落。浩浩人事遷。高樓變深壑。妻孥行萬里。一身橫北郭。西山有仙童。玉醴自斟酌。念我耕稼苦。予我一丸藥。服食不崇朝。身輕如燕雀。乘風上天門。天門張錦幕。上帝方高會。羣真相蒲博。姮娥揮玉杯。宓妃亦善謔。我從草野來。不知此間樂。拜起常疑畏。欲前還復卻。上帝按劍怒。執我加束縛。斥逐歸下土。裸身仍力作。秋風動木葉。千里起朝涼。念我同心人。乃在天一方。盈盈白玉姿。凜凜當嚴霜。依樽還採菖。飛鴻集高木。金盞一身多。況乃僮與僕。白袷苦無祛。野宿苦無廬。仰天見明月。明月照單車。宛雒多貴遊。駑馬獨趨趨。兒童前溪來。釣得雙鯉魚。欣然剖鯉魚。其中無素書。平安不可問。垂涕滿長裾。同居輕歲月。臨別重須臾。中宵戒僕馬。執手且踟蹰。明朝異鄉縣。今日猶相見。鴻雁歸有時。遊子去無期。千里或萬里。出門不可知。喔喔羣雞鳴。揮涕從此辭。落葉懷故條。誰能復上枝。悲風爲我作。明月爲我落。列星盡西流。一天皆漠漠。山海限微軀。魂夢能相索。方壺旣靈府。圓嶠亦天都。宮闕遙相望。羣仙羅四隅。築室一何高。植基一何疎。戴之以巨鼈。浮沈與之俱。

金玉盈萬仞。安危託一魚。上帝以爲巧。毋乃成大憊。一朝釣鼈去。兩山皆淪胥。敗戶猶有樞。朽木猶有株。如何龍鳳闕。萬里寄空虛。薄暮宿上蔡。凌晨出東門。古墓不三尺。翹翹荆與榛。停車問里左。云是翟家墳。五毒備其中。千載無人耕。饑飢夾路啼。野狐當晝鳴。白骨次第出。羣盜摧爲薪。帝曰咨巫陽。爲我招其魂。茫茫不可招。俯視惟陰雲。長安小家子。十五入宮門。君王假顏色。富貴若平生。中宵出片言。封侯及六親。婕妤謝病去。皇后亦路人。白晝望西宮。但見風與雲。一顧使人好。一怒使人老。君恩如流光。豈得長相照。得寵且莫驕。掖庭多年少。蓬萊三萬里。上與青天平。丹藥結爲雲。金玉流爲聲。高芝爲宮闕。樓題宿列星。使者立堂下。銅色而龍形。容成醉且歌。安期舞前楹。麒麟同豢豕。鳳凰乃家禽。我欲從之遊。渺渺隔滄溟。蛟魚揚洪波。方舟不可行。不如飲美酒。坐待桑田更。大海成陸道。安步升其庭。海上五神山。芝田在其中。借問種者誰。乃是東王公。玉母歲一來。列駟乘西風。賓主坐前殿。解馬同歡燕。芝苗紛冉冉。兩驂食其半。主人勃然怒。放之清津岸。王母徒步歸。閉關不相見。龍伯有大人。一朝忽叛亂。五山震且驚。索馬與之戰。此馬久放逸。鞍勒皆中斷。束手無柰何。仰天但長嘆。六鼈齋盜糧。羣仙亦糜爛。惜小誤其大。古今以爲患。

七言古詩

漢宮篇

東井咸陽道。西秦函谷關。蕩蕩終南樹。巍巍龍首山。未央宮闕當山起。控引黃河連上時。日月倒臨金馬門。虹霓飛出昆明水。虎威列署接林光。複道排空三百里。後宮臺館更紛紜。懸黎垂棘蕩星文。芙蓉雜畫樓如錦。波弋名香氣似雲。朱檐綠篆瓊瑤榜。罽毼直在青霄上。開戶平看太華峯。垂簾下視仙人掌。人玉露濕春風吹。入沈沈桂閣中。蓬萊海月琉璃影。牛女星橋翡翠通。翡翠金幃雲繭織。流蘇細結雙鸞。中有姪何諸貴人。窈窕繁華好顏色。軟組輕輿玳瑁裝。蜃珂小馬明珠勒。宮婢扶車各往來。永巷相逢不相識。五采翻鴻宛轉絲。衽妝妖服競良時。今日調笙靈女廟。明朝侍宴影娥池。影娥池裏羣山綠。少女微風吹綺縠。弱柳千條映翠眉。奇花萬樹扶膏沐。況兼四海久昇平。朝廷大政委公卿。蓮勺先生嘗頌聖。富平公子伴微行。此日中官徵伎樂。此時歌舞換新聲。歌舞名姬天下選。瓊英如雨珠如霰。掖庭祕戲三萬人。江河刀火空中變。別有傾城趙主家。鳳毛步輦初相見。一曲青娥落御筵。六宮粉黛無嬌面。先皇金屋未精奇。掄材新構昭陽殿。昭陽門闥紫霞封。懸錢飛鑷亂鳴鐘。畫閣丹楹三玉鳳。高堂璧帶九金龍。金龍五色擁神仙。結綠珊瑚銀漢邊。百尺檟題鱗甲椽。千人錦繡合宮船。巧窮丁緩迷三象。蛤出真夷號萬年。月墜月升都白晝。草枯草綠總春天。一家專寵擅椒房。君王夜夜夢高唐。歸風送遠聽皇后。雙鳳離鸞出慶郎。侍女招搖雲母扇。妖童掩映紫犀牀。昭儀常啼帝嘗喜。聯裙並輦花光裏。異錦鮫文賜老奴。綠綈敗篋盛龍子。涎涎燕尾啄皇孫。假父新侯輕許史。自言富貴無窮期。不知一旦皇孫死。露華少嬪滿蒼苔。碧

樹周阿鎖不開。解光細刻前朝事。翟蕪淒涼棄草萊。飛塵已暗青熊席。蹋地誰歌赤鳳來。半晴半雨含風閣。花落花開月影臺。鴻嘉烜赫桑田改。姊弟驕奢竟誰在。昔日蕭條班婕妤。猶奉園陵倚素車。十年反覆看黃土。紈扇優游自著書。

五言律詩

會稽山

禹貢揚州域。當年集萬方。旌旗傳下國。鹵簿畫虛堂。江海東南合。衣冠日月光。至今耕隴上。猶拾古珪璋。

秦望山

山有李斯頌德碑

五十秦皇帝。憑高望故疆。有司除輦道。丞相治文章。山鬼華陰出。神仙海路長。壯遊心已倦。回首亦思鄉。

得友人入蜀信

使星趨益部。猶滯武昌樓。月色疎官柳。天河近客舟。青楓鴻雁信。白帝古今秋。楚蜀三千里。茫茫江水流。

送友人入楚

此地一樽酒。送君千里車。瀟湘飛雁斷。牛斗夜窗虛。客馬長天遠。離人細雨初。吳江通漢水。遮莫有雙魚。

西陵

句踐入臣于吳。羣臣祖之。固陵。卽此也。

傷殘諸父老。盡送越王來。夫婦行千里。臣民進一杯。風移亡國恨。鳥識舊君臺。江水無終極。吳宮安在哉。

長門

自得君王寵。芳華不可論。一宮長白晝。六院盡黃昏。珠玉空天下。風雲傍至尊。寧知十載後。揮涕買長門。

懷金天石

落落金天石。才名勝我曹。長空飛獨鶴。短褐對羣豪。蘭思盈江水。秋風蕩楚騷。十年成一賦。詞客近如毛。

夜坐懷何次張

何子栖南浦。村人不識名。大山雲外立。小艇月中行。鳥宿侵花氣。鐘疎度雨聲。知君嘗夜咏。秋思一江清。

西陵

范蠡屯兵處。相傳在上岡。龍文來鑄浦。虎氣壓錢塘。月照殘軍壘。風生古戰場。大江同往昔。列國幾興亡。

土城村

吳越春秋。越王得西施三年。學服土城村而獻吳王。即此也。今在五雲門外。

新築西施館。名倡教鼓琴。關山馳白羽。閨閣費黃金。賤妾三年舞。君王一片心。時危憑女子。花霧土城深。

石門

古女陽亭也。

勾踐行成日。單車此地過。甲兵三戰盡。臣僕一身多。石室中宵泣。蘇臺永夜歌。十年還躍馬。囚虜竟如何。

贈剡新令二首甲申

使君來下邑。終日聽流泉。事簡庭栖鹿。山深吏學仙。縣當神女宅。人在永平年。自有雙飛鳥。無勞剡水船。才子今何在。行春曲水涯。河陽無雜樹。山澗盡桃花。烟霧郎官履。雲霞百姓家。遊人新適館。授粲有胡麻。

同羣帥飲台州使君山亭

文武皆邦憲。銜杯共此亭。山花迎畫戟。野鳥下公庭。露冕行春草。橫刀看落星。不知逢掖賤。高唱數峯青。

早過斗城

雲林不可辨。始信客途艱。大路橫千樹。孤城託萬山。鐘鳴梁國寺。月抱漢時關。僕馬凌霜度。蕭蕭鬢欲斑。

山鄰

山曲有東鄰。園亭護小春。水深明碧藻。松老駁蒼鱗。魚鳥時窺客。雲霞欲近人。頻攜一樽酒。慰我澗之濱。

家君掛冠避地董村董村剡東之至僻者也侍行二首

解綬離官舍。驅馳叢棘中。懸崖一以斷。星漢不相通。木魅溪前火。山神馬後風。從人多戰栗。偶語怨而翁。此地稱奇僻。緣崖上碧空。弟兄千里外。父子萬山中。野店龍王井。深林虎偃風。家君偏嘯傲。不肯泣途窮。

懷天則上人

念爾嘗枯坐。蕭條古寺風。閑門千劫外。清磬一聲通。松桂寒支遁。龍蛇雜遠公。天花詩思裏。駘蕩落江東。

剡溪夜行三首

蕭蕭飛鴻羽。迢迢逐水流。暮雲遮斷浦。暝色上高丘。誰是戴安道。空勞王子猷。明知興已盡。無處可歸舟。輕橈乘早發。薄暮尙沈浮。宿鳥時驚月。前山欲斷舟。星雲連海氣。烟火帶楓秋。小嶺無人借。空尋古沃洲。野舟何處宿。夜色滿平沙。寺遠鐘聲細。溪迴漁火斜。雲深迷客路。烟起辨人家。杜若無聊賴。離披託晚霞。

山中夜坐憶岷生

孤客憑高坐。疎鐘落塞鴻。四山人語靜。一月照虛空。天地同寒水。鄉關共遠風。仲容三百里。知在雁聲中。

羣帥

羣帥稱強勇。連營慰聖朝。國家輕爵土。七校盡金貂。賜馬馳前殿。橫旗出大橋。燕然高幾里。仍欲問嫖姚。

禹穴

禹穴高岡上。東西費討尋。千年藏日御。萬象入山陰。地迴丹書合。天迴牛斗深。略知探舊跡。已足竊詞林。

席上贈王將軍三首

綠幘少年裝。還家髮半黃。寶刀忘歲月。戰馬死疆場。殘夜明孤燭。雄心盡一觴。錦袍今百結。猶裹舊時瘡。慷慨辭軍幕。蕭條返故鄉。金戈秋月冷。大樹暮雲長。部曲皆豪貴。妻孥半死喪。國家求舊將。寶劍尙光鋠。將軍猶老健。拱手謝戎行。天子不復問。公卿亦已忘。悲歌燕市酒。蹋鞠少年場。搔首西風裏。平原看騶驢。

飲章安郡廨

漂泊江湖客。稍栖月桂樓。十年驅病馬。一雁路寒洲。詞賦嗟梁苑。笙歌到楚囚。悲吟驚滿座。謂我欲何求。

家事二首

扶桑驚落葉。海水亦羣飛。龍伯移山去。家君解組歸。壯年趨虎觀。垂老臥牛衣。有子皆飄泊。何人慰少微。雲物寄長嗟。浮生託白沙。市朝皆走馬。兄弟盡無家。苦雨侵常棣。秋風冷桂華。力耕人半老。何以答兼葭。

高眠

雲深分野暗。無處望長安。燕雀風前起。鵲鴿原上寒。寤歌慚日月。出入畏衣冠。盡道春花發。高眠不去看。

送友人出塞三首

可憐傅介子。辛苦事樓蘭。意氣憑殘甲。功名託敝鞍。三河霜外白。一劍雨中寒。今夜關山月。何人共爾看。

奉檄騎邊馬。親朋夾道看。都人誇壯武。妻子問平安。落日隨車盡。浮雲度幕難。黃沙千里暮。何處是桑乾。

驃騎年猶少。公孫鬢已斑。軍書懸姓氏。砧杵怨河山。大雪平高磧。飛雲獨上關。縣官方好武。此去幾時還。

海潮

潮勢蕩天門。蓬萊倒石根。雲山時大小。日月變朝昏。急雨沈南極。長風徙北鯤。江湖亦自帝。終讓谷王尊。

登北固山二首

吳山從此盡。楚水到今長。日月懸高樹。星河帶遠荒。樓船時聚散。戰馬亦元黃。欲問孫劉事。平沙幾夕陽。

朱方前古地。斗嶺鬱岩嶢。霸氣南徐盡。龍旗北府遙。殘秋通楚漢。宿雁下金焦。一望皆江水。何由辨六朝。

明州道懷方仲謀

可惜三春道。迢迢逐轉蓬。身移千樹裏。愁寄萬花中。落日長湖馬。疎雲小苑風。我行君抱膝。總是歎途窮。

蒜山寄李將軍

木落萬山頭。旌旗處處秋。授兵新授尉。傳檄古諸侯。百戰生寒月。三江欲倒流。元戎何處宿。今夜鎮東樓。

黃鎮南馬

將軍今謝世。牧圉盡逃亡。金埒春前迴。龍文病後黃。房星分野暗。宛國道途長。薄暮聞吹角。猶思舊戰場。

送別

桃李三村月。年年足嘯歌。一朝不得意。萬里問關河。故國猶如此。他鄉復柰何。親朋今夕外。惟有塞鴻過。

秋江驟雨

雷雨忽然至。蛟人蕩水濱。一天驚雁陣。四海散龍羣。巫峽渾凝暮。巴江盡入雲。馮夷親擊鼓。烈烈萬方聞。

寄金將軍

時移軍
薊門

西部假司馬。漁陽復借賢。秋衣經萬杵。邊月盡三年。雜樹盤沙嶺。冰河帶玉田。遙思爭戰地。烽火照龍淵。

送人之陝右

離亭新折柳。相顧一潸然。露冷終南樹。霜寒渭北天。馬行秦嶺下。詩滿漢宮前。爲問笙歌處。繁華似往年。

送友還郴州

公車不得志。桂水自揚舲。天闊懸巴嶺。風高隔洞庭。蘇仙山正綠。義帝塚猶青。此去多憑弔。新詩好共聽。

十月二十日蚤耕

蚤下來牟種。雞鳴出短扉。天空一月小。河轉列星稀。古寺鐘初動。長林鳥欲飛。自公無詔使。顛倒著牛衣。

賦贈吳日千

吾黨諸兄弟。雄高數日千。自言淪落後。四海一焦先。策杖山當戶。悲歌月滿天。友朋深愛我。爲祕上林篇。

懷友人羈長沙

知君書記好。久借紫騮前。草色深如許。歸期尙渺然。波濤連漢水。風雨閉樓船。萬古昭潭月。相看又一年。

五言排律

謁金龍廟

淮海名州督。江河異姓王。一麾移水陸。薄怒變滄桑。日月嘗離席。風雲不下堂。雕輿驂虎豹。玉勒駕機槍。雷電生虛棟。蛟龍宿畫梁。潮聲丹陛裏。雨氣袞衣傍。鱗介徵羣族。旌旄出上方。波濤千嶂夕。螻蟻萬金航。圭壁空吳楚。威聲走混茫。自慚忠信薄。祈爾護餘皇。

玉梁觀處

漢武帝時祈雨處也。在玉笥山。

石簷臨平野。朱宮接大荒。四山新伏臘。兩漢舊壇場。赤帝留金殿。青天玉梁虹。霓時聚散。星斗半蒼茫。左掖通軒后。南楹揖始皇。江聲開幔近。海色上樓黃。屏翳扶丹轂。蜚廉傍繡裳。鸞旂回霧合。鷗尾帶雲翔。龍氣旋高嶺。神風出古牆。斷碑豐草裏。前代有文章。

七言律詩

懷吳六益

滄桑回首不堪論。詞客支離江上村。平野秋風吹短劍。故宮明月誦長門。東南自古推吳季。邱壑於今有謝鯤。十載途窮偏笑傲。遙遙詩思落清尊。

沛上懷古

離離白月照遺宮。泗水南流薛水通。馳道千年秦帝樹。高臺百尺漢王風。父兄供帳羅城下。子弟歌聲滿沛中。今日黃雲都散盡。四鄉衰草正蒙戎。

懷韓友一

升堂兄弟有韓嬰。極目浮雲屢變更。兩度滄桑看虎嘯。幾年風雨共雞鳴。酒壇散去星初落。燕市歸來月半明。一病荒原生白髮。不堪重說故人情。

懷杜子

衡門三尺對疎梅。徒倚懷人首重回。短髮愧予春楚市。長虹爲爾出燕臺。深秋落葉征雲斷。旅夜歸魂入夢來。生死交情餘涕淚。幾番明月照蒿萊。

送友人北上

吳中才子舊知名。行李蕭蕭賦北征。落日平沙瞻鳳闕。浮雲遠樹出龍城。三秋車馬人偏老。百戰關河草未生。回首知君頻悵望。夜深清嘯起邊聲。

寄題友一南園

韓康採藥歎途窮。歸築溪山一畝宮。太室花光朝暮見。少微星氣有無中。文章今古誰爭道。泉石東南自鑿空。知爾近裁招隱賦。月明叢桂起秋風。

懷沈友聖

澤國才人立渺茫。平分沈約舊詞場。慚予短榻耕春草。羨爾疎簾對夕陽。搖落數年增意氣。風塵千里見文章。友聖時有浙東之遊錢江八月潮聲急。爲泛秋槎問大荒。

江上憶閔山紆乙酉

高樓徒倚暮雲平。極目中原愧此行。齊魯春風新草色。梁陳明月舊江聲。頻年赤羽悲王粲。幾度青尊憶馬卿。賦就上林應自笑。文章天地一書生。

臘月十二夜西興觀師甲申

貔貅十萬盡行枚。星動寒霄畫角哀。校尉珠旗冰上渡。將軍金甲月中來。軍纏圓嶠絲三匝。人賜葡萄酒一杯。傳語西風催後騎。明朝會食越王臺。

禹廟三首

南鎮遺宮鎖寂寥。山城伏臘自蕭條。萬方玉帛埋春草。百粵君臣散海潮。青簡雲霞猶在望。蒼龍風雨尙來朝。夜深鐘鼓聞祠廟。疑勅王師伐有苗。

南服稽山近斗魁。前朝宮廟此中開。星光夜覆秦皇石。劍氣朝連越女臺。古屋風生羣后至。高壇月出萬神來。卻憐陵墓無人辨。碑碣文章滿綠苔。

東越名岡古帝封。遙瞻寢殿有長松。春田歲歲耕山鳥。禹廟下相傳有羣鳥耘田也。畫棟朝朝鎖玉龍。殿梁上有僧繇

鏡湖龍圖居人以鐵索鍊之。五等衣冠來下國。諸侯圭璧上高峯。只今多少防風氏。悵望威靈隔九重。

出塞三首

同錢又冉賦得門字

龍首宮前舊虎賁。蕭蕭亭障幾黃昏。風吹古戍寒金甲。月落高山冷玉門。河北冰霜常墮指。天南燈火自招魂。陳湯上疏還多事。又欲移兵吐谷渾。

朝廷急詔伐烏孫。亞夫傳言開壁門。中軍尙駐溫宿國。前隊已指姑墨屯。虎豹長號野谷動。旌旗半捲星

河昏。上書天子報曲折。使者夜叩倉琅根。

五十校尉車啾啾。飛書刻日赴崑崙。將軍自執虎頭盾。壯士單繫犢鼻褌。烏就叩邊求節綬。樓蘭當道供

饗殮。去時天下七科適。歸闕帶劍官期門。

登金陵報恩寺浮屠

側弁長干醉綠醅。還登高刹望南台。江聲遠出平沙下。梵氣遙從絕國來。瀛島神山三土阜。荆揚巨澤五浮杯。酒徒不識桑門戒。箕踞維摩白玉臺。

晚泊錢塘

客路維舟酒半醺。長林暮靄自氤氳。四山燈火移歸馬。兩岸笙歌蕩晚雲。月色欲留王內史。濤聲猶見伍將軍。夜深人散看星斗。天語高高似可聞。

送友人從軍

慷慨投書學荷戈。今朝行李定如何。砧聲夜靜城邊落。木葉秋高塞上多。家在垂楊朱雀渡。人行衰草白狼河。鍾山舊友能相憶。此地從來有雁過。

同錢符尹宿京口道觀

閒館焚香夜未分。故人清嘯碧天聞。月升海嶠懸鷗尾。潮入江臯起雁羣。玉殿龍鱗飛作雨。金庭丹火結爲雲。莫言世事增華髮。且叩虛皇讀祕文。

讀西域傳四首

諸番稽首盡南轅。戊己旌門立上原。右將夫人朝帝闕。名王侍子與郊蹕。縣官新駕西戎馬。公主初教外國言。漢使往來三百輩。可憐猶未識河源。

博望初出宛夏間。百人惟有二人還。執弓甘父驅匹馬。持節副使分兩關。封事近言叩蜀道。圖書遙斷崑崙山。西風烈烈吹懸度。吏士含淚叩刀環。

一奉軍書出遠邊。故鄉雲物又經年。皮山落月人難度。積石浮沙馬不前。薤上遊魂招谷吉。城南思婦怨張騫。寄聲塞外功名客。休勸君王戍酒泉。

燉煌譯使達康居。武帝雄心尙未舒。王到龜茲傳漢鼓。妃來平樂賜金車。朝廷新建桑羊策。丞相徒看詛馬書。西域已知屯戍悔。東封依舊聽相如。

送友人之廣南

並馬銜杯日未曛。羊城山水正愁君。秋聲已入庭前樹。客路猶懸嶺外雲。溟海上連辰極動。星河南去越天分。年來莫問流人狀。知有清猿不可聞。

生日

菑田海畔草紛紜。辛苦年年隴上耘。半世桑弧懸敗屋。一天詞賦寄荒雲。垂綸寂寞鼃鼃窟。倚杖逍遙雁鷺羣。門外兩株彭澤柳。夜深搖落不堪聞。

避兵二首

昨夜邊書始報聞。今朝鼓角忽紛紜。免冠前殿庾開府。錦蓋南山祖鎮軍。井幹樓臺空萬戶。茂陵烽火入重雲。家人扶得相如避。猶倚長松說古文。

野火連天芳草洲。茫茫旌旆白雲愁。霜清大寨吹龍角。風起中軍入鳳樓。道上解衣懷故印。江干遺甲識通侯。書生奔竄無人問。蕭瑟寒林一敝裘。

田事

七月高禾秀海鄉。我家田事尙茫茫。老夫自歎身多病。婦子爭言草未央。行野幾人悲黍稷。下泉何日浸

苞稂調饑自是吾曹分。莫祝今年有萬箱。

懷勝時弟

瑯琊男子按龍鐔。不數詞人賦汾陰。日月下看千右事。虹霓遙指萬年心。吾弟有大義事過於樂布當世重之春風南國時驅馬。秋水東皋獨鼓琴。自夢西堂今幾載。徘徊池草一沾襟。

懷唐歐冶

十載傳經心事違。天涯抱膝送斜暉。家懸宗測新圖障。山近嚴陵舊釣磯。京雒雲深花正發。柴桑秋老葉初飛。悠悠榮瘁真難問。辛苦先生一布衣。

短衣

敗屋風來曉正涼。短衣高坐咏清商。自憐卒歲無成褐。豈願三星有報章。南去雲天浮海嶠。西來日月覆滄浪。不知幾處寒侵骨。遠水遙山夜滿霜。

懷錢符尹又冉兄弟

生平圖史共荆扉。滿目兵戈此事違。伐輻河千秋水漲。懷人天畔早鴻飛。華陽雲氣來金曲。滄海潮回出釣磯。符尹所居幾爲潮沒故幸之夢爾同看思舊賦。疎星落落下寒幃。

酬陶冰修兼簡聖從

歇浦長才各鳳飛。君家兄弟更光輝。武昌春水雲生戶。彭澤秋風月滿衣。十載林泉看鹿幘。一朝閭闔下

龍旂謝安雖受朝廷寄。知是東山志不違。

台州同陳念茲何陟潘馬。又范馮予人飲宣武將軍幄甲申。

小校傳麾駐鼓聲。邀賓夜醉石塘西。傳杯海曲扶桑曉。閱舞江城畫閣低。自愧詞壇誰豹變。卻憐戎幕有烏栖。將軍莫詫行廚美。應念君王食駉騏。

憶昔寄昭華社諸子

十年淪落舊京華。杯酒相逢弟子家。逐客綈袍看意氣。大夫縞帶有雲霞。兔園分賦人猶醉。鳧渚觀魚日未斜。聞道平臺今野草。空餘明月照蒹葭。

種秧又冉至

五月新田學種秧。故人單馬向山莊。方呼王霸耕南畝。又與侯芭坐北牀。春去玉門邊月暗。星橫珠浦陣雲長。閒愁卻誤農家事。臥看西鄰食稻粱。

同山紆溪上觀魚

野夫前歲學耕鋤。世事今年更不如。南國波臣爭貢篚。東陵瓜叟又詩書。斜陽盡送征人馬。窮巷應無長者車。尚有荒郊容我輩。角巾欹側自觀魚。

秋日臥病憶孟衍兄

憶昔分符出帝畿。北風解組賦還歸。經橫姑熟參軍坐。菊滿潯陽舊令衣。芳草洲邊人臥病。落星樓上雁

高飛弟兄幾載悲遼闊。空望三台入少微。

苦雨

何日溪邊策短筇。海天樓閣映芙蓉。露華漢苑仙人掌。雲起齊州武帝封。綠野春濃飛燕雀。晴江潮落散魚龍。高唐兩岸皆朝爽。細數陽臺第幾峯。

病起同名世弟徂耕

病起猶餘再宿糧。二方飽食刈童梁。耦耕盡日山風起。學稼終朝海氣黃。人自長弓屯細柳。我將短耒掛扶桑。晚來共引牛衣臥。遙望星垣正渺茫。

避亂入剡溪三首

流離剡水愧蒹葭。夢入桃源路又賒。越國諸侯新上計。吳中客子久無家。時平支遁猶調馬。世亂王尼祇敝車。漂母旣亡誰授食。徘徊空澗待胡麻。沃洲天姥盡旌旂。遊子宵征歎式微。喬木百年看馬跡。浮雲十里上牛衣。石牀罷釣人何處。剡水移舟雪正飛。欲覓金庭空悵望。劉家山上幾斜暉。

五言絕句

雒陽

維陽三月時。夾道張羅幕。歲歲看花開。無人惜花落。

吳女詞

江天月萬年。江水人千里。乘月採芙蓉。歌聲落江水。

湘水詞二首

洞床木葉下。明月帶江寒。美人渾不寢。半夜泣秋蘭。
美人已千載。蘭澤空悠悠。深淺瀟湘月。滄茫入暮流。

對酒

撫劍對尊酒。低頭無一言。三年大梁客。辜負信陵恩。

騎士行

新屬富平侯。蒼鷹臂綠鞵。長安看意氣。走馬問青樓。

古意

聞郎有兩姬。雙枝並婀娜。同是一家人。何爲不見我。

寄朱使君

遊子失平生。白頭羈遠宦。辛苦閨中人。年年望秋雁。

通籍

得意新通籍。高車返故鄉。語言非往昔。僕馬自成行。

贈嚴將軍甲申

金鞍白鼻騮。萬死戰龍沙。天子不召見。橫刀入酒家。

江南曲

知是誰家女。年年江上逢。秋風潮自急。莫更採芙蓉。

七言絕句

射蛟行

溟海陰雲晝不開。樓船燈火照蓬萊。蛟魚搏戰三千里。箭射扶桑頂上來。

古鄮懷陸子元

迢迢星漢隔河梁。千里關山共夕陽。舊日子雲今尚在。不知何處賦長楊。

昭君怨

一曲琵琶塞外彈。君王歌舞夢中看。官人不識邊庭苦。猶說長門月影寒。

城南感秋

清秋落月重徘徊。愁見城南古鳳臺。一夜西風行萬里。黃河草色渡江來。

宮怨

無數鶯聲太液池。隨風吹入綠楊枝。後宮春色何年好。惟有昭陽殿裏知。

秋夜送友人入楚

一江吳楚暮流長。把酒高樓欲斷腸。遊子單衣何處去。宋家秋葉滿湖湘。

梁園

睢陽池館起黃塵。帝子風流問水濱。往歲平臺鄒馬月。可憐移照路旁人。

懷周宿來二首

詞賦十年通北闕。風雲一日下南臺。南臺山在寧越門外。越王餘善釣白龍處也。閩中父老知名姓。盡道相如擁傳來。

三月南天草色青。征車遙指越王庭。釣龍臺下江流急。猶恐風流近使星。

同雯社諸子秦淮夜飲癸未

夾城池館御河通。上苑笙歌試好風。燈火滿樓人似玉。芙蓉十里月明中。

邊詞

數堆橫石漢時營。曾見嫖姚幾戰爭。風送邊聲寒北闕。月牽閨恨到平城。

姚江夜泊

數聲鼓角動江流。遷客蕭蕭起暮愁。舊日圖書都散盡。千羣鐵甲一孤舟。

長安雜詩二首

風雨彫殘玉樹秋。漢家遺事滿荒樓。兒童連臂長安道。爭說昭陽殿裏遊。
萬戶千門古建章。金吾散去月蒼茫。集靈壇上垂龍樹。一夜蕭蕭變白楊。

曉發篋山

綠樹紅霞古岷州。馬蹄踏踐生衰草。高山飛葉送行人。月落悲歌滿官道。

夜過張將軍甲申

傳箭紛紛日勒山。月明非復舊時關。將軍鈴閣偏無事。帳下齊歌雉子斑。

鎌山草堂詩合鈔卷下

古樂府三十一首

聖人出

聖人出。臨高臺。網羅紛員哉。佳人生駢離。何山澤之攏椒蘭芳。芰荷爲衣行踳踳。蠶饑桑萎水洋洋。

上邪

上邪如孫如魚。臨蘭池。樂莫樂。新相知。悲莫悲。生別離。我舍君。將安之。天地日月繚紹之。百川東到海。千秋萬歲不復西。

臨高臺

臨高臺。軒以敞。江水千里流。黃鵠乘風騰遠遊。關弓射鵠鵠且下。月穆穆。日華光。獻重觴。願託黃鵠上太華。奉藥一玉箱。萬年天地長。

遠如期

遠如期。光四鄰。施德大。莽若雲。甘露三載。單于歸化闕庭。謁者贊引升殿。諸蠻夷君長侯王數萬。渭橋夾道。陳錦繡綺縠。玉劍金璽。令賜單于。便奉天子神靈。世曼壽永康寧。

石流

石流華陽流沙東逝。水落石立河爲香。釣竿不可接。石上有蘭行人絕。思我美人。美人來何遲。願一見顏
色。長懷瓊樹枝。

長松標二首

長松千仞岡。皎皎雲中月。悲風江上來。蕭條對霜雪。
山上何所有。落落一長松。高飛衆鳥盡。不知西與東。

夜度孃二首

葡萄帶實垂。鴛鴦雙雙棲。不是天上月。儂來有誰知。
儂來初見月。儂去露華濃。夜夜逢郎面。朝朝似夢中。

古別離

渺渺生別離。一去無見期。團團三五月。何爲入空帷。春風搖蕙草。妾心常自持。爲樂及盛年。所悲芳華歇。
與君新結婚。一見復一別。蕙草有時摧。恩情終不絕。

烏栖曲四首

繡帳歡筵度紅燭。北堂夜夜人如玉。與郎同心結水頭。感郎殷勤水不流。
風吹蓮葉何田田。妾在江南方採蓮。啼鳥不來斗未落。與郎持抱登繡閣。

牀頭月出華燈燿。美人含啼還似笑。天雞欲曙太無情。單身螢火送君行。
美人窈窕雲堂中。朱顏玉貌金盤龍。歡樂可憐城上烏。一夕千年豈足多。

飲馬長城窟行

蕭蕭出塞北。飲馬長城窟。長城何迢迢。朔風寒馬骨。男兒當格鬪。萬弩一朝發。功成賞幾人。前軍多戰沒。
辭家不相見。白日欲飛霰。不聞爺孃喚。但見南歸雁。生女未爲憂。生男未爲喜。黃河水瀟瀟。戰伐何時已。

北風行

北風冷。雨雪雱。金卮漾美酒。翠被鬱金香。悵然思遠人。淚下沾衣裳。妾似轆轤牽金井。君如明月炤空房。
相思不相見。同心各異縣。悲風起邊城。寄書雲中雁。

空城雀

有雀飛飛來。乳穀空城阿。空城少人行。日暮安樂多。啄粟下飲水。曠曠無網羅。豈不慕黃鵠。柘彈珠丸射。
願比鳳凰翼。終爲螻蟻食。翱翔復何之。守此須努力。

長相思

長相思。遠相憶。征夫一去歸不得。北斗橫天起歎息。賤妾萬里心。苦無萬里翼。所悲顏色摧。君歸亦不識。

桃葉歌四首

桃葉復桃葉。我來迎接汝。三月桃花木。風吹將汝去。

桃葉復桃葉。江水清可憐。一船打兩槳。迎笑春風前。
桃葉復桃葉。與郎去幾里。渡江未到岸。燕子雙雙起。
桃葉復桃葉。渡江忽風波。郎道無所苦。儂道是黃河。

白附鳩二首

飛飛白附鳩。送郎不能食。新亭美酒香。應是郎氣息。
思歡若芙蓉。應種深閨裏。會多別離少。宛轉見蓮子。

青驄白馬一首

青驄白馬金絡頭。石橋栢梁恣遨遊。可憐白馬年少郎。千金寶劍生容光。
可憐青驄遊下都。採菱佳人戲五湖。佳人採菱湖水寒。可憐珠環贈所歡。問君可憐雨雪霏。何時白馬復西歸。問君可憐西曲孃。朱唇玉指忘故鄉。青驄白馬宿誰家。莫愁催送六萌車。齊唱可憐清且長。朝朝暮暮永相望。

五言古詩

錄別三首

揮手從茲去。遠望何益歸。昔日結綢繆。今當千里違。千里各異縣。置酒且徘徊。上有垂天雲。下有孤鳥飛。
秋風行蕭蕭。爲樂當及時。歲月日以深。百年安可知。出門盡他鄉。引領當告誰。

大江起悲風。游子方驅車。驅車復何之。行行遠故廬。明星高在天。烏雀歸其巢。曠野何茫茫。白楊聲蕭蕭。常爲千里客。良馬慘不驕。顏色無常好。誰爲王子喬。

歡娛生離別。一夕爲千秋。清酒炤紅顏。去去忽白頭。離獸號其羣。孤鳥鳴啾啾。羊腸何紆盤。俯視大河流。河流日以遠。鯉魚日以緩。春芳但消歇。親戚一時散。且復立斯須。攜手一繾綣。上言崇令德。下言加餐飯。

雜詩四首

鬱鬱井中竹。三載不成竿。青青河邊草。一夕滿平原。老聃貴無爲。揚雄守太玄。登高一以眺。喟然思千年。去去復何之。榮名誰與傳。來往自成蹊。桃李終不言。

盈盈年十五。弱腕約珠環。動搖生微風。竟體流芳蘭。羅衣翠帶長。綺室桂爲梁。流蘇垂錦帳。羅列雙鴛鴦。昔時良家女。今爲蕩子婦。何爲紅粉粧。棄捐在中路。

明明牛女星。雙雙雲間鳥。蕭蕭楊柳枝。渺渺零陵道。輕風散馬蹄。細雨露百草。思君君不來。悲傷令人老。九州何足道。天地渺蒼蒼。仰視浮雲翔。真人騎上驤。我欲凌風遊。展轉入帝鄉。帝鄉無仙術。誰爲長年方。

教我守真素。忘言乃無疆。

詠史

步出雒城門。鴻鵠何翩躚。纍纍陳死人。縱橫松柏間。問是誰家子。朱戶白玉樓。翱翔華屋下。零落散荒丘。人生日就老。能無千載憂。宴安懷鳩毒。靈根不可求。遐哉宗與尚。翻然思遠遊。

覽古詩

瞻眺北邙坂。還望終南山。壘壘漢諸陵。茂恭與長原。包河帶宛雒。虎豹守其巔。陰雨出龍旗。伐鼓震祁連。奄忽時代易。九鼎泗水遷。慷慨大風歌。蕭條陵上烟。珠襦盡顛倒。玉斝傳世間。王孫雜賈豎。寧復顧寢園。行行驅馬去。嗚咽更何言。

七言古詩

古意

蕩子愛後婦。貞女守故夫。誰爲陌上桑。云是秦羅敷。妾本雒陽名家子。長嫁新豐當酒壚。門前車馬多公侯。丞相旌旄列上頭。來入酒家最高樓。珠聲玉鱗羅珍羞。願我挾瑟彈箜篌。清歌一曲江水流。使君贈我金芙蓉。妾心耿耿明河東。使君贈我雙琅玕。妾心悠悠湘水寒。妾身徒區區。夫婿亦自殊。十五爲人婦。富貴安所須。使君堂上婦。終始亦不渝。星月西飛隨天迴。孤鴻嗷嗷雲中歸。有心有恨輕別離。雖苟活兮亦何爲。

傷別

機上新羅織鳳凰。池邊比翼雙鴛鴦。嫋嫋晴雲繞春路。叢叢香草拂衣裳。淮水東流無盡期。驕行白馬勒青絲。三月新婚輕棄擲。桃花李花辭故枝。安得風迴還着樹。飄緲常似三春時。

雁來歌

秋風颯颯江水長。百丈雲飛海日黃。鴻雁南歸杳茫茫。關山雨雪離其行。相思歷亂迷南北。不如庭中雙鴛鴦。佳人一去橫四海。月明月落總秋霜。采芙蓉兮木之上。攀薜荔兮水中央。雲之深兮鳥有路。川之廣兮濟無梁。

望夫石

望夫山上望夫石。望夫一去歸不得。白日不動江水流。遙見蒼梧雲氣黑。江邊花柳爲誰春。可憐山頭一石人。石人千年猶解語。願逐月華隨君去。風雨忽來身欲飛。駕龍乘雲求所思。如何陌上悠悠女。棄捐中道忽如遺。

五言律詩

九日

秋露滿金莖。風高鼓角聲。孤鴻辭北闕。雙杵落邊城。但看黃花發。寧知白髮生。王宏亦大雅。送酒至今名。

九日懷金天石

遙憐金處士。家住五湖東。乘興來何晚。新詩惠轉工。離情寒夜月。遠色抱天空。陶菊年年發。登臨此日同。宿表兄鞠元恪齋。

親朋離亂後。相見淚盈襟。浪迹交游滿。幽居故舊深。山空寒皎月。木落送瑤琴。更聽天雞動。冷然萬里心。

送友人入楚

洞庭木落下。匹馬任揚鞭。江闊疑無地。山高欲到天。飛花斜日外。歸夢落鴻邊。此去愁兵甲。親朋好計年。

春日過何次張

干戈猶滿眼。此日草新青。天地來春色。江湖隱客新。風微雙紫燕。人遠一玄經。落落誰知己。酣歌第五亭。

山中作

古木前朝在。幽人白髮侵。終然不得意。莫負百年心。地險黃河急。天遙北斗深。山中但穩臥。流水有知音。

幽居忽憶昔年同山紆諸子雪川之游

武帝初臨極。星辰滿御溝。九天開漢日。萬玉會龍樓。古雪防風國。騷人康樂游。卽今登覽處。回首亦滄洲。

同友一晚眺

遊屐同登眺。山山帶晚暉。潮平帆影亂。木落鳥聲稀。湖海供高枕。行藏傍少微。憐君如惠子。老大獨相依。

秋日東行集方仲謀齋

昔別皆年少。風塵駐馬看。相逢離亂後。江海一杯寒。落日悲鴻影。浮雲老鷓冠。乘槎秋水近。消息到天難。

題薛山書屋

薛嶺蒼苔靜。幽人獨去閒。潮聲落庭樹。月色動寒山。嫋嫋秋風下。飄飄飛鳥還。機雲初入雒。離思滿鄉關。

元日同友一作

與爾一長嘯。開軒萬里情。江山寒曙色。鐘鼓動春聲。甲子更陶令。椒花隔鳳城。年年栢葉酒。豺虎半縱橫。

琴臺

長卿方作客。四壁正淒涼。酒肆留巴蜀。琴心出鳳凰。文章開貢道。日月下夷荒。憑弔千年事。巴江尚渺茫。

積雨

離亂多風雨。笳歌動夕扉。頻來山燕舞。愁看楚雲飛。塞北多衰草。天南一布衣。不知人事改。栽菊故園肥。

題非非上人精舍時並蒂蓮開

祇樹談元者。於今有道林。曉風清磬遠。明月雪山深。迸水從初地。天花落梵音。自慚非許詢。吟送一相尋。

關按詢無仄音

村居

豺虎嗟行路。浮生樂考槃。竹籬栽藥滿。草閣帶江寒。世事人頻異。山花我獨看。蒼蒼見白日。何處是長安。窮途悲阮籍。車轍欲安之。天遠連江盡。雲深歸鶴遲。七哀聊自賦。十畝畏人知。何處逢漁父。滄浪慰所思。

七言律詩

秋日雜感八首

天清鼓角大梁城。歎息當年屢被兵。鐵騎千羣留晉鄙。雕車終日待侯生。黃河水落秋風起。白鶴山高古木平。極望窮猿號雨雪。乘槎那得到東京。

匹馬行來萬樹間。蒼茫宿霧失青山。大夫作賦沉何處。壯士悲歌去不還。天地無心看豹變。風雲猶似覩龍顏。招魂一望秋江遠。白鶴千年好再攀。

南條亦是神州路。豈爲明珠駿馬來。五嶺烟花多瘴癘。百蠻風雨共樓臺。鐘聲漲海龍蛇動。日炤銅梁天地開。鴻雁不傳衡外信。長歌終夜望三台。

西來天地入荊州。三峽平分萬里流。巴蜀君臣稱漢裔。衡山玉帛走諸侯。江清宮闕雲霞裏。人去離騷風雨秋。極目滄浪煙樹闊。沉沉雙鯉斷漁舟。

赤鳥高映海門潮。百萬貔貅擁聖朝。大禹巡方瞻氣象。越王采葛動歌謠。軍中寶劍時干斗。塞上強弓好射雕。聞道乘槎看日近。終教黃髮老漁樵。

漢家樓閣倚三山。萬里江流去不還。白晝落星寒虎帳。青天走馬渡龍關。蓬萊秋迴人誰到。寶鼎弓高我欲攀。安得夷吾賢太傅。石頭風雨往來閑。

秦關百二舊京華。丹鳳城南落日斜。天馬歌殘空有曲。鼎湖人去盡無家。風烟萬井連邊月。花鳥千山入塞笳。木葉蕭蕭悲歲晚。卽今誰泛斗牛槎。

陶令歸來三徑老。鹿門妻子隱龐公。掛冠不羨山陰道。策蹇常吟剡水東。日月遙臨滄海上。龍蛇欲動禹

王宮弟兄秉耒粗承志。晚臥牛衣衰草中。

懷古二首

茫茫兵甲走齊梁。鉅鹿關東古戰場。六國提戈方虎視。將軍罷釣亦龍翔。當年事業開新主。今日風雲動太行。鼎足不移明大節。蒯通何用更徬徨。

劍閣重關蜀帝都。宗臣遺恨月明孤。襄陽風物多耆舊。梁父驅馳詘壯圖。羽扇千年留八陣。巴江終日走三吳。可堪仙掌悲零雨。銅雀于今定有無。

秋日詠懷憶同社諸子寄次張

搖落關河霜雪清。年年鴻雁故人情。南山雲合斜陽恨。北闕天寒宿草平。一臥蘆花生白髮。滿江楓樹變秋聲。最憐何點稱高士。極浦潮迴聽鳥鳴。

憶金陵昭華社諸子

風流帝子切雲冠。京雒才人夾道看。文藝從來傳漢史。騷經幾卷出劉安。繁絃急管多華髮。錦石秋花一釣竿。回首勞勞亭上客。至今雨雪過江寒。

秋日積雨寄懷杜子

高山渺渺塞鴻過。日暮行雲濕女羅。滄海波光隨客棹。洞庭煙色在漁蓑。詩成白雪知音少。門對寒潮入夢多。悵望故人風雨外。黃花無恙鳥空歌。

對雪有懷六益日千二吳子

昨夜黃雲飛塞北。平明大雪滿寒蕪。樽前高下誰清濁。天外樓臺問有無。一自梁園違簡札。共看草色渡江湖。郢中曲調人間少。二仲風流興不孤。

內兄馮梅存過草堂有感

一從分手隔江鄉。戎馬蕭條復悼亡。衰草窮年唯短褐。故人臘月到寒塘。謝家咏雪憐兄妹。宋玉悲秋泣鳳凰。此日親朋纔有幾。風塵回首各蒼茫。

小至雨雪同晉右弟感舊呈家兄

亂離兄弟相逢日。雲物初登萬里臺。宮草依稀天外長。荆花悵望雪中開。沙飛南北千鴻落。春轉鼃鼃八駿來。卻憶燭珠年少事。耦耕深處是蓬萊。

和友一憶登金陵鳳凰臺

金陵回首帝王州。李白揚帆憶舊遊。六代宮中人去盡。鳳凰臺下水空流。十年病客嗟行路。萬里清江此釣舟。忽謾傳書看白雪。知君飄泊更滄洲。

酬嘉禾沈函祈兼憶杜釜山

暮春風雨相逢日。渺渺滄江重爾思。一自南樓傳八詠。豈憐千載不同時。吳關木落人空老。越岫雲開馬去遲。爲報舊遊還努力。何年重說杜陵詩。

寄懷天則上人兼呈同社諸子

西山晴色曉烟青。縹緲休公倚翠屏。杯渡春雲生極浦。詩成白雪動滄溟。百年諸子高蓮社。此日論交一草亭。最是石牀堪避世。人間還有少微星。

寄岷生姪

十年零落大江濱。回首京華益愴神。復道燕臺連海嶠。鼓鐘天上動星辰。一樽黯淡憐芳草。此日風流憶古人。谷口子真今尚在。可無春興一逡巡。

寄錢又冉

苦憶雲間陸士龍。遙看寶劍落芙蓉。秋江委玦思公子。明月馮欄對雪峯。歧路人間堪悵望。十年作賦更從容。憐余髮短登樓日。馬首東來意萬重。

春日柬次張兼懷天石六益日干介人

知君才藻本翩翩。把酒悲歌益愴然。公子離憂多夜雨。王孫青草又新年。一時湖海元高士。千古衣冠落日邊。堪歎鄒枚同躍馬。梁園舊客有誰憐。

贈陳孝則

烽煙萬里接吳臺。客舍逢君曙色開。梅柳垂垂天際發。江湖滾滾日邊來。那堪白雪人空老。不負青雲數舉杯。百尺元龍真落魄。應憐回首共蒿萊。

懷勝時弟客閩兼憶閩中諸同社

朋輩飄零已十載。鵲鴿飛去又三秋。吳關落日迷龍劍。南國春雲傍馬頭。橫海樓船新瘴氣。謝家池草自風流。七閩本是天王地。綵筆縱橫憶舊遊。

雨後過山紆

騎馬攀雲濕不妨。故人東海卽滄浪。鷓鴣日落啼衰草。白雁江寒去渺茫。何處城邊看北斗。應憐鬢色已河陽。相逢那減飛揚意。杯酒論詩攬大荒。

返舊居望海之作

荒浪池館客心驚。宿鳥窺人時一鳴。日月蒼蒼浮海樹。蛟龍滾滾帶潮聲。水連天極瞻牛女。山到咸陽起石鯨。往事空傳家萬里。窮愁磊落老虞卿。

郊行入古寺

野哭家家急暮砧。窮途阮籍倦登臨。側身四望星河遠。驅馬常愁雨雪深。空峽天高聞虎嘯。大江潮落聽龍吟。暫來小院尋支遁。樹木蕭條古殿陰。

懷宮紫元

十載飄零萬事非。遙遙尺素羽毛稀。共看作賦空梁苑。且喜含香拜紫微。江上青楓淹客夢。淮南叢桂傍人衣。山中高臥知無恙。雞黍逢君歌采薇。

晚步懷元恪

江鄉回首定如何。搖落年來長薜蘿。鴻雁茫茫催薄暮。星辰渺渺散黃河。思家王粲風霜早。稽古桓榮車馬多。元恪著有榮谷錄爲報故人須秉燭。豈令晝短易蹉跎。

題友一別業

蕭條三徑白雲求。潦倒江湖此舊遊。世事十年催短髮。濤聲百里上危樓。柳陰宅畔思陶令。瓜熟秋風憶故侯。嘗傍日邊思彼美。滄浪更下月明舟。

寄唐歐冶

終南佳氣半蒿萊。玉女峯頭鴻雁哀。人去青門愁北望。花開黃菊賦歸來。河山世事雙飛翼。天地秋風一釣臺。海內故交零落盡。憐君珍重雒陽才。

贈答袁介人

雨雪紛霏萬里迴。袁安散髮臥蒿萊。采蘭淮浦王孫路。委玦湘江帝子哀。揮洒樽前鸚鵡賦。蕭條木落鳳凰臺。遙看月出歌鐘起。羨爾星高接上台。

對雨懷山東吳子

雁去十年看不返。懷君獨自對芙蓉。天涯涕淚人猶昔。故國存亡山幾重。東海烟濤連極浦。秦朝風雨入寒松。可憐桑落杯中酒。千里相思急暮鐘。

哭山東何孝廉卒于吳門

騏驥當年走建章。幾回抽筆獻長楊。行來岱色通朝氣。歸去江流正夕陽。封禪可曾司馬賦。紵衣猶帶令公香。旅魂好傍延陵劍。歌舞臺前非舊鄉。

客有舊勳衛遊百粵賦此送之

嗟爾征車逐塞塵。側身南望一沾巾。雲開衡岳通吳楚。風過龍江識漢秦。銅柱鮫人迷寶玉。金臺駿骨畫麒麟。銜杯莫待傷遲暮。故國尊鱸未是貧。

春申浦和友一

蒼茫大浦接城陰。黃浦雄名動古今。萬里提封開楚國。千年獵騎繞雲林。山空風雨潮聲闊。日射蛟龍水氣深。汎汎江湖愁滿地。釣磯徒老歲寒心。

五言絕句

贈天則上人

偶來逢惠遠。落葉正紛紛。相對無言語。溪邊生白雲。

春望

舊國烟花裏。相思萬里回。巫山高不極。楚水自天來。

閨思二首

君去來何遲。相思不相見。春風歲歲來。不似梁間燕。明月照人心。猶聞別時語。與君非一身。白馬臨邛去。

簡盛鄰汝二首

君作浦南客。予登海上山。月明如有意。蕭瑟入吳關。烟波江上客。遠望一登臺。歲歲西風急。故人來不來。

送別

離別登高意。青山送馬蹄。荆門方落葉。何事楚雲西。

古意

微步金階遠。看花日漸昏。秋邊皎皎月。不遣到長門。

七言絕句

邊詞二首

烽火樓頭鼓角鳴。千山落日閉孤城。黃河無限東流水。不寄沙場萬里情。玉帳分弓橫寶刀。平沙雨雪渡臨洮。卽今九月河冰合。一曲胡姬賜錦袍。

宿岷生姪齋有感二首

月落高樓思渺然。江村風雨對牀眠。烏衣戚戚多親姓。愁鬢相看又十年。此日花開知爲誰。孤雲獨去晚風吹。舊游何事深相憶。黃鳥催人酒一卮。

題韓吾策湖亭

青青野竹迴含烟。月落霜清繫釣船。郢客此中歌白雪。蓬萊幾尺到秋邊。

贈吾策

湘水東流無盡時。桃花夾岸浪生遲。韓康采藥人千里。招隱知君獨有詩。

金陵懷古

三山落日少人行。六代衣冠蔓草平。獨有長江流不盡。潮來還傍石頭城。

送客歸鄉

登山臨水月遲遲。此日悲秋異昔時。離亂故鄉如隔世。兒童笑指客爲誰。

贈別張若疇

山靜遙遙何處鐘。送君杯酒自從容。腰間寶劍行千里。影落平江起臥龍。

歸雁

一聲歸雁入江干。春色遙遙總未看。屬國白頭還在否。上林書帛至今寒。

寄錢又冉信符尹之變

故人不見久尋思。比日空攀桂樹枝。急難沙頭舊兄弟。百年風雨一孤兒。

漫詠

搖路秋風埋百草。登高一望空懷抱。人間不知漢與秦。石室山中讀黃老。

元恪山房牡丹盛開邀余往觀病不克赴遙有此詠

漢宮寂寞老紅顏。玉女乘鸞尚未還。一自姚黃看爛漫。却餘春色到人間。西去巫山枉斷腸。何來紅粉一庭香。閒看少室高天上。花發明年更舉觴。

贈徐方曹

偉長中論近何如。年少看君獨著書。鄴下才人舊遊地。漳河東去渺愁予。

送客入楚

大江南去雪紛紛。回首荒臺盡白雲。夢澤天寒爭夜獵。何人鼓瑟弔湘君。

夜雨

千里楓林雁去遲。蕭蕭神女至今疑。愁人日下三聲淚。況復江鳴夜雨時。

過李將軍宅


鐵騎橫行出大荒。還留漢節在瀟湘。經過此地空流水。滿樹蟬聲對夕陽。

雨公姪見寄新詩賦答

昔日才名阮仲容。新詩高削九芙蓉。山橋茅屋無人到。尺素遙傳意萬重。

釣臺

萬里長風動地迴。白雲遙看客星來。河山漢室多非舊。百尺高高一釣臺。





花王閣騰稿



紀坤著



本館據畿輔叢書
本排印初編各叢
書僅有此本

花玉閣藏稿

花王閣賸藁

明 獻縣紀 坤著

芙蓉詞效昌谷體

芙蓉脈脈愁空江。秋波對影成一雙。一滴清淚徹水底。紅沁龍女玻璃窗。垂楊壓岸煙痕重。月墮中央寒不動。離魂一縷裊如絲。千回縈繞鴛鴦夢。相思木斲寡女船。夜深孤泊前灘前。秋燈黯澹坐微嘆。蘆花頭白風颯然。

南遊不遇過交甫遺佩處戲題

想像精靈隔淼漫。暮雲深處佩珊珊。明珠價貴知難贈。但乞神仙一面看。

半夜

半夜倉皇接報書。開緘拍案一驚呼。諸公至此吾何望。天道如斯古所無。欹枕沈吟連夢寐。挑燈絮問怪妻孥。披衣啟戶看乾象。黯黯寒星數點孤。

聞孫閣部罷歸

岌岌甯前戍。朝朝起戰雲。如何大丞相。翻作故將軍。國尙多清議。權仍屬聖君。廟堂甯左計。或恐是傳聞。清明日野外閒步

處處青帘似見招。杖藜試踏綠裙腰。衰翁難結尋春伴。蝴蝶相隨過小橋。

偕董天士蔡家河遊眺

不知新綠滿平蕪。野老提壺偶見呼。遊興久闌聊一出。戰塵不到便堪娛。從來挾策無高士。邇日談兵厭腐儒。猶怪先生春筮上。數行小楷寫陰符。

崇禎癸酉下第還里後作四首

十年求仕進。髮白志不成。青雲諒無分。決意謀歸耕。良友喜我閒。攜酒就我傾。謂我世慮澹。可與談無生。醜女不得嫁。安可誇堅貞。敢以坎壈士。冒此高隱名。覽鏡照我顏。寒陋難爲狀。一一視妻孥。亦非簪佩相。桐柳不中梁。人生宜自量。況有黍稌田。不乏雞豚餉。物無兩大理。富貴甯兼望。已矣吾何營。頽焉適天放。儒生困寒餓。侘傺恆嗟吁。國家鐘鼎養。豈以供爾娛。艱難求俊彥。將使憂患紓。假爾十萬師。手握銅虎符。風塵滿河洛。自信能平無。不如安爾分。從我持犂鋤。伊昔游京華。怪我山林態。今日返田園。怪我鄉音改。學步亦云勞。無益徒成悔。所幸匍匐歸。吾足故仍在。看婦事機杼。呼童課樵采。惟賴皋與夔。努力營四海。

唁許總戎於內黃間道歸里途中書所見二首

慘淡孤城閉。羣凶正合攻。日沈兵氣外。風起戰聲中。曠野無人覺。荒榛有路通。潛行吾尚怯。嗟爾虎狼叢。

處處殘骸拄。腥風拂面過。天心甯好殺。人事或干和。一騎飛搖鞚。中宵喚渡河。儻然哀痛詔。急遣滅催科。
所聞

出門復入門。憂心日草草。何時黃巾平。骨肉得相保。治亂相倚伏。此理信穹昊。吳河清會有期。恨我生太早。
側聞闔外事。功罪日紛擾。恩怨亦人情。吾敢怪諸老。且願緩報施。稍待風塵掃。

送張林宗歸河南

去矣復何道。心知重會難。君看殘照裏。秋氣滿長安。

庚午下第二首

忽忽晨鐘動。巡檐微一吁。將明天慘澹。小憩夢模糊。蹶起收殘帙。沈吟問老奴。今朝有車馬。得到涿州無。
下第經三度。胡爲又此行。本來非隱逸。未敢薄功名。良友憐同病。同寓九人皆報罷高僧不世情。是夕寺僧置酒
燈前相勸勉。切切到天明。

聞欽定閣黨案出借鈔未得

此局終當有。甯期在此時。丹書何用見。名姓世原知。

錢尙寶家秋海棠時尙寶已貧甚

翦翦秋風一斷腸。美人無力怯新涼。十分春色臙脂暈。記得前身是海棠。

與高斗南夜話

是非轆轤總難知。青史從來尙異詞。莊叟久持齊物論。章惇任上黨人碑。廟堂公議甯恩怨。草野傳聞漫信疑。千古興衰觀大局。且來把酒慶明時。

羽沖見示下第詩有豈其真有命搔首問蒼蒼句戲書答之

萬蟻酣戰槐南枝。吾曹不辨誰雄雌。蒼蒼下視皆蟻耳。得失安望天公知。劉郎乃欲叫閭闔。問所不解何其癡。昨夜北河魚大上。村人提網紛紛馳。魴鱖多逢折柳貫。笞箸或亦空手持。撇波一擲隨所遇。其間甯有神靈司。事無必得必不得。老夫所見皆如斯。先生儻不焚筆研。偶然而中當有時。已呼小豎市新釀。兼令老婢烹銀鬢。速來與爾澆壘塊。酒酣且賦黃花詩。

盛陽先生見余和劉羽沖詩亦和以見規有狂奴猶故態曠達是牢騷句敬賦一篇奉答

曠達非所能。牢騷亦未敢。功名阻坎坷。兵火瀕危險。頽然盛年去。久矣壯心減。同龕老彌勒。終日門雙掩。忽吟天問篇。戲語非譏貶。譬如蚯蚓蛙。吟噪偶陰窞。焉能執曲譜。細以宮商檢。勞公古誼深。規我客氣斂。甯知無文字。何處著嗤點。公看水中月。流影忽冉冉。月落水無痕。空色兩不染。

十刹海訪無相上人適游方歸以所畫名勝巨冊索題分拈得廬山揚子江黃河東海黃山雲海嚴

瀨六幅

廬山遊不盡。況乃畫廬山。若問廬山意。廬山在此間。一口吸西江。吐向剡谿紙。盆涌不可收。一筆一千里。

黃河天上來。一綫落平地。俗手畫波濤。妙手畫其氣。
大海無端倪。師從何處寫。窅然空闊意。自寫觀海者。
靈氣自卷舒。歛忽千變化。在山作雲海。落紙成斯畫。

案畫字在卦韻不在禡韻然義山無題詩己以畫與
嫁下爲韻則唐人有此讀矣此蓋卽據義山詩也

師畫嚴子灘。不著嚴子廟。神在山水間。士偶但其貌。

快哉行併序

劉羽沖折柬邀余及董天士、胡奕光、李丹厓、陳質扶。云：明日河房看一佳事。比就坐，祕不言。酒數行，則有博徒數輩攜妓泛舟喧鬪而過者。羽沖呼起視，叩所以笑不言，各勒浮大白，乃述始末。慨然感之，爲賦快哉行一篇，知傷忠厚之旨，然鬱鬱久矣，一決莫遏。君子或諒其激於義爾。

一笑天地驚。此樂古未有。平生不解飲。滿引亦一斗。老革昔媚璫。正士皆碎首。甯知時勢移。人事反覆手。昔年金谷花。今日章臺柳。巧哉造物心。此罰勝枷杻。微酣談舊事。因果信非偶。淋搗揮醉墨。神鬼運吾肘。姓名諱不書。聊以存忠厚。時皇帝十載。太歲在丁丑。恢台仲夏月。其日二十九。同觀者六人。題者河間叟。清明泛舟衛河。以花似錦時高閣望草如茵處。小車行分韻得花行二字。

水繞紅闌賣酒家。當壚小女總如花。東風亦似招人飲。颭出青帘柳外斜。
沿堤宛轉棹歌聲。草色花光到眼明。忽照清波頭似雪。多慙蛺蝶趁船行。

聞無相上人遊華山已沒於兵

出世猶難免。彌傷住世心。乾坤無地隱。兵火入山深。一笑忘相約。三生恐莫尋。亂離師已厭。震旦肯重臨。

聞河南流寇將窺畿輔移家郡城

慘澹陰風萬木號。黑雲低壓古城壕。全家避亂禪心擾。滿市澆愁酒價高。燕雀處堂聊旦夕。龍蛇起陸更

弓刀。時滄州土寇亦蠢動。傳聞玉帳河魁將。正倩儒生講六韜。

姜辰三招飲戲題

雄心消盡禮金仙。枯坐蒲團四五年。結習不知全淨未。隨君試坐散花天。紅鐙綠酒近三更。飲到微酣故態生。賴是黃鸝相喚住。不然拍案又論兵。

登泰山

何地能銷鬱鬱情。且登岱嶽望蓬瀛。無人到處方孤立。有路通時更上行。四面愁陰千里合。一聲慟哭萬山驚。儒生未可譏封禪。終是能逢世太平。

落花效玉溪生體

狼藉東風遽已衰。迢迢虛作隔年期。鶯藏新綠仍高樹。蝶戀餘香尙故枝。痛惜漫勞將盡後。護持好及未殘時。美人顏色還如此。二八嬌嬈自不知。

村外閒步偶訪孤樹上人蘭若

隔林彷彿寺門開。便訪幽栖老萬回。草色綠侵危砌上。菜花黃過斷牆來。寺久頽廢僧多他徒上人天性恬淡破屋數椽閉關晏如也。

閒雲無意時相值。野鳥忘機兩不猜。滿院春風同一笑。金經堆架任生苔。

醉歌

十里五里桃李花。東家蝴蝶飛西家。春風引我信步起。青鞋蹋徧溪邊沙。欣然一往忘遠近。黃公壩外垂楊遮。百錢偶爾未挂杖。村翁熟識猶容賒。自斟自酌自吟嘯。不知返照蒸紅霞。挑菜人歸影散亂。騎牛童唱聲嘔呀。小奴控蹇遠相覓。興盡我亦隨昏鴉。閒花野草相掩映。短衫破帽時欹斜。癡兒未可瞋太醉。老子此樂真無涯。行過淺水見蝌蚪。愛爾不作官蝦蟆。

卽事二首

芳草沿堤一徑斜。小樓背水是誰家。鶉鳩聲裏霏霏雨。微溼春煙壓杏花。風影搖搖酒幔青。畫船多泊水邊亭。醉來貪看鴛鴦浴。倚破紅窗出字櫺。

宿劉氏別業二首

雨溼煙痕重。花藏暝色深。放船忘遠近。泊櫂偶園林。桑下曾三宿。桃源試再尋。主人殊不惡。水閣尙鳴琴。燈火明籬落。開門手共攜。呼童催晚酌。索硯寫新題。芳景連寒食。濃春滿大堤。翻邀乘興返。明日聽黃鸝。

紅塵

紅塵十丈走香車。仍向玄都道士家。誰料劉郎重到後。菜花開過又桃花。

登內黃城樓

憂天亦覺杞人愚。此際憂來不可祛。風日蒼黃羣盜滿。山河破碎一城孤。通儒謀國多書卷。上相籌兵祇地圖。總戎出政府。檄有檢驗輿圖。黃河在前。淳沲在後。天險足恃。增兵何用之文。宗廟神靈應閔念。昭陵石馬幾時趨。

哭董天士四首

事事知心自古難。平生二老對相看。飛來遺札驚投箸。哭到荒村欲蓋棺。殘藁未收新畫冊。天士以餘貲惟賣破儒冠。布衾兩幅無妨殮。在日黔婁不畏寒。

五岳填胸氣不平。談鋒一觸便縱橫。不逢黃祖真天幸。曾怪嵇康太世情。開牖有時邀月入。杖藜到處避人行。料應塵海無堪語。且試驂鸞問紫清。

百結懸鵝兩鬢霜。自餐冰雪潤空腸。一生惟得秋冬氣。到死不知羅綺香。天士不娶。寒貫村醪纔破戒。老栖僧舍是還鄉。只今一暝無餘事。肯要青蠅作弔忙。

十年相約謝風塵。天地無情殞此人。亂世逃禪聊解脫。衰年哭友倍酸辛。關河決漭連兵氣。齒髮蒼浪寄病身。泉下有靈應念我。白楊孤冢亦傷神。

蝶

園林隨意弄芳菲。亂颭仙人五色衣。幾日團團花上繭。一時便趁好風飛。尋芳處處不曾停。瞥過紅牆入紫庭。未可輕將羅扇撲。隄防觸響護花鈴。

蜂

向暖尋新蕊。乘春過洞房。蝶羣容爾入。蠶尾竟誰防。媚態纖腰軟。嬌吟細韻長。味甘能悅口。況有蜜脾香。

戲題二絕句併序

崇禎戊寅孟村土寇忽夜至。盡室踉蹌以逃。比歸囊篋盡空。併掠一古琴去。嗟乎賊亦具賞鑒哉。因戲書二絕以排悶。

廿載懸塵壁。何人問此琴。可憐兵火裏。此輩乃知音。枯桐閱歲多。神物含靈爽。正直七條弦。汝彈恐不響。

蔣其祥訂遊西山同人促歸不及待悵然留別

我家古瀛海。平地無寸山。北行到京國。始見翠掃天。往來咫尺地。不及窮躋攀。友朋日相笑。俗病何由痊。豈知阻登陟。不盡因癡頑。清暉娛耳目。奇福天所慳。蒼松白石下。茲事皆前緣。蠟屐約西邁。脂輦仍南還。側想九節杖。直上萬仞巔。俯視見百里。一氣如浮煙。豆人而寸馬。蠕蠕相後先。慨焉念故人。逐隊行其間。斜陽渡聖水。疲馬不可鞭。

旌吾弟自真定夜歸

隔牆一喚驚。還喜半夜汝。從何處來。攜手都忘閉門戶。禦寒先遣洗樽罍。音書雖近無人往。道路多虞幾度猜。此日生歸是天幸。旅顏消瘦未須哀。

送景星赴鄉試

不能隨我隱。爾亦自有見。舉世盡鴻冥。何日息龍戰。挾策干諸侯。遊士吾所賤。讀書二十年。當為明廷獻。世事雖靡常。公道此未變。果為珊瑚枝。鐵網終能罽。豎儒守一經。詎足拯離亂。儻可梯青雲。或冀理一縣。撫字緩催科。且恤百里患。杯水沃車薪。終勝助以扇。黃花取次開。老眼摩挲看。此願果否償。送爾淚如霰。

送奕光歸里

白露已零天地秋。布衣老大提蒯緱。燕辭故壘逝將去。蝶抱殘花何所求。平生不識韓吏部。他時誤覓劉。荆州渭川修竹綠無恙。歸歟勿失千戶侯。

自相國莊至夫人莊戲為一絕相國莊馮道故居夫人莊道婦家也

青史空留字數行。書生終是讓侯王。劉光伯墓無尋處。劉炫與馮道皆景城人相國夫人各有莊。

五節橋即單家橋也正德間文安土寇掠獻縣有五女抗節同死於此橋

五節橋邊水。寒聲日夜悲。當年誰勦寇。貽禍到蛾眉。

陪諸友夜飲作

山鳥何曾諳管絃。邀留無那主人賢。黃蜂紫蝶如相識。綠酒紅鐙亦可憐。稍避喧闐殊刺促。似防冷落轉周旋。纔知杜老真瀟灑。解共燕姬晚放船。

咏史三首

珍重焦延壽。諸孫尚有碑。云何多畏忌。不著撰人誰。

老氏貴和光。斯謀良亦得。平生陳仲弓。賢者固難測。
爰歷續六章。小學亦殊絕。至今祀孔庭。不在經師列。

拜月詞

芙蓉怯冷啼清露。銀河絡角明蟾渡。斂帚偷拜悄致詞。姮娥應見郎遊處。夜深微轉北斗杓。輪斜漸隔西
鄰樹。東方欲曙白濛濛。玉鏡掩然墮煙霧。

舊遊

衛河依舊水悠悠。人事興衰一轉頭。故邸殘花前度夢。高墳宿草幾回秋。五君久避山王貴。二水遙憐汴
泗流。鐵佛祠旁三太息。老僧猶自話徐州。

觀奕

重瞳項羽劇酣戰。一目湘東方突圍。莫怪無言倚松坐。先生老矣不知幾。

三婦豔

大婦鳴夜杼。中婦營晨炊。小婦日高起。傅粉調胭脂。婉孌丈人前。借問憐者誰。

君馬黃

君馬黃。臣馬驪。兩馬當道相並馳。君馬絕塵奔。臣馬長鳴悲。馬不能言臣知之。吁嗟乎。臣馬饑。

臨高臺

臨高臺。見四郊。凸者壘。凹者壕。白者骨。青者蒿。竄者燕雀搏者鴉。倉黃迸散方嗷嗷。惜哉遠不聞其號。

朱鷺

大旆揚。鼓聲起。朱鷺翩翩翔不止。矢石交。鼓聲死。朱鷺曲蜷縮其尾。咄咄朱鷺。吾何責爾爾之技。止於此。

戰城南

城南之戰。風沙漫漫。智者在後。愚者前後。無恙前者。顛老聃有明戒。無為天下先。君子守其雌。保己終百年。

牧牛詞併序

村外縱眺。見牧豎晚歸。有抱牛背而眠者。人不墮。牛亦不逸。甚矣其相習也。天下相習如是。亦何施不可哉。此可深長思矣。

清晨隨牛出。日暮隨牛歸。牛自解往返。不勞人指揮。人行牛亦行。人止牛亦止。夫孰使之然。了不知所以。乃知久而化。不在鞭與箠。君看高柳外。暮色蒼然裏。人自抱牛眠。牛自渡溪水。

春日閒步

白頭不稱作春遊。剛被黃鸝喚不休。宿麥青時正暄暖。好花紅處一夷猶。能歌那得馮惟一。

馮吉字惟一。道之長子。善琵琶。解歌舞。有滑稽之風。村西三里相國莊。即其故里也。有酒且酬劉武周。村北古阜。邑志以為劉武周墓。武周山後馬。多愧田翁舊。

相識。芳郊記我躍驂騑。

村居偶作

鯁生本未玷朝班。但息名心便得閒。故友全疏惟伴佛。荒村可隱不須山。陶潛相遇羲皇上。葛亮憑居伊呂間。親見將軍建旗鼓。左輪幾度染朱殷。

間遊口號

七尺紅藤挂酒瓢。春風應笑鬢蕭蕭。誰知老去閒情在。小摘溪頭豔婦苗。豔婦苗。草花也。其色非紅。非白。酷肖美人之面。

三月三日

潑火雨過天蔚藍。野花村北連村南。流年已屆五十五。佳節可憐三月三。賀方回句。偶借用之。得毋以偷語為笑耶。土風不解曲水飲。老懷自愛芳醪甘。緜蠻黃鳥坐高柳。汝曹相對何所談。

高粱橋陪諸公會飲遇雨走筆戲呈

羯鼓連搗催羽觴。酒痕重疊滿衣裳。紅樞忽訝天光暝。白袷先驚雨氣涼。諸老朝參應最急。野人信宿定無妨。儘教淨洗芙蓉面。一榻僧樓自在香。

寄無相上人

不見旻公又幾年。聞從吳岳向西川。雲顏秦隴黃霾日。山夾巴江綠到天。鴻雁無家誰乞食。豺狼滿地可安禪。故人今夜尋荒刹。黯對琉璃正不眠。

感懷二首

說劍談兵二十年。不成一事已華顛。空虛漸悟芭蕉喻。解脫纔參柏子禪。幾度遠公邀入社。至今靈運未
 生天。近來又覺金經幻。只藉殘花自在眠。
 睡起常常近午初。刁騷短鬢懶頻梳。忽悲忽喜兒童怪。不履不衫朋友疏。大勢可知聊縱酒。餘情未斷偶
 窺書。妻孥苦欲相排遣。時報花開錦不如。

題天士畫册十二首

蒼厓無路煙霧晦。黃葉滿林風雨寒。此是人蹤難到處。公於何處倚筇看。空山

孤峰溜雨瘦到骨。老柏僵寒皴作鱗。莫怪筆鋒太奇峭。先生只算自傳神。孤峯

翦破冰紈寫玉妃。禿毫焦墨只依稀。徐熙自作山林畫。不向黃筌問是非。梅

秋水芙蓉悵有思。美人腸斷倩誰知。可憐畫裏荒寒景。恰寫離魂欲去時。荷

烏犍藉草眠。牧者在何處。我欲借之騎。直入青山去。牛

擁腫何人問散材。畫中相對一徘徊。天然位置無行列。絕勝園亭作意栽。古樹

莊叟固非魚。焉得知魚樂。君作戲魚圖。想從何處落。人自適于天。魚自適于水。莫問魚如何。吾寫吾懷耳。

魚戲

端坐秋樹根。塊然無與伍。不知讀何書。但見鬚眉古。只愁手持。或是井田譜。秋林

雜佩珊珊望汝。微波渺渺愁予。只恐遊人瞥見。等閒乞得明珠。漢皋

戲蝶游蜂上下。深黃淺綠扶疏。此老胸懷磊落。如何也註蟲魚。草蟲意此幅點染特工

狼藉曾嘲朱勗。橫行亦比相如。此物忽靈忽蠢。先生所畫誰歟。蟹

如塊如漚如豆。半天俯視羣山。飄緲孤雲一片。知君神往其間。雲山氣之內而別作片雲於上。意境絕奇。

寒食遺悶

檢點殘春又一年。鼓鼙聲裡落花天。荒村三日無焚掠。恐是黃巾亦禁煙。

黃金臺故址

燕昭求俊乂。遺蹟留荒臺。古來士不遇。過此恆徘徊。我聞莘野人。千駟輕浮埃。豈有天下士。可以黃金媒。偶然得樂毅。磨室故鼎回。安知騎劫輩。非即緣茲來。風塵日瀕洞。專闢資真才。眷懷廉恥將。慷慨徒銜哀。

登景州塔隋開皇中故迹也

雲梯面面禮彌陀。猶是開皇宰塔波。諸佛慈悲竟何事。坐看十度換山河。隋唐五代宋金元至國朝已十一代矣

徘徊絕頂欲何之。悽絕斜陽欲落時。煙樹蒼茫一懷古。低頭遙拜亞夫祠。

讀工部桃花細逐楊花落黃鳥時兼白鳥飛句偶有所感戲為絕句二首

狼藉東風不暫停。小園一夜響金鈴。桃花莫逐楊花落。到水何曾共化萍。

江邊相遇便相攜。雙去雙來羽翼齊。若到間關花下語。白鷗那得及黃鸝。

題蘇武牧羝圖圖尾細書馬遠字其真贋亦無以辨之。代舊園給諫作舊園訝而不用姑自存之

散牧羝羊四五羣。自持秃節臥寒雲。漢廷卿相無窮事。十九年中幸不聞。

九日慈仁寺西閣登高以滿城風雨近重陽分韻拈得城字

九日高空放午晴。僧樓借眺此閒行。老松偃蹇真吾黨。寒菊蕭疏不世情。一霎涼颿蘇酒病。滿窗虛籟助吟聲。潘郎莫怯催租吏。未必追呼到鳳城。

寄羽沖

黃葉風高下雁羣。故人書訊杳無聞。君胡爲者天涯路。我所思兮日暮雲。作相定推真直院。封侯可到李將軍。當年有客同投筆。邇日還家又賣文。胡奕光也

自嘲

青荷作笠草爲衣。游倦沿溪信步歸。撲簌沙鷗忽驚起。方知猶未到忘機。

奕光得家書戲贈

珍珠密字寫新愁。應怪蕭郎愛遠遊。那識春風楊柳陌。行人亦悔覓封侯。

贈孤樹上人

衣鉢蕭然手自攜。偶逢破寺翦蒿藜。一龕自藉莓苔坐。白晝有時鼪鼯啼。貧乏齋糧惟煮菜。老無語錄恐災梨。瀾翻三藏如瓶瀉。可要人間玉簡栖。

歲試榜發名綴三等之末賦呈諸友

鼙鼓三通放午衙。題名粉壁字如鴉。一番曉露滋蘭草。最後春風到棟花。命數於今知倚伏。前歲試謬文居第一章自古有瑜瑕。寸心得失吾能了。未要交游衆口譁。儒生濟濟列青袍。次第勻排似六爻。畢竟有人居末席。豈應惟我占前茅。諸公指日鶯遷樹。秘閣他年鳳占巢。玉尺量才親手握。可能甲乙總無淆。

衛河泛舟

老矣重來作此遊。春波依舊綠如油。顏垣三尺苔痕古。認得徐娘賣酒樓。

天士齋壁畫著色竹數竿因書其側

董生瘦如竹。疏野亦相肖。壁上翠琅玕。只如自寫照。東坡墨君堂。畫意不畫貌。變爲著色圖。頗亦天機到。北地此君稀。瞥見忽一笑。爾我與畫三。相對且兀傲。

晚步

草際生微煙。惻惻衣袖冷。頽陽沒半輪。影在高樹頂。樵牧半已歸。策杖獨引領。老病惜餘光。慨然悲暮景。

雪

窮陰蕭瑟歲聿闌。凍雲作雪淒風寒。坐擁衣裘時凜凜。起看天地方漫漫。縛賊何當似李愬。閉門正恐多袁安。明年新麥得嘗否。遺蝗殄盡聊相寬。

憫旱行

低田龜坼高田槁。五百里內無青草。昂昂官長騎馬來。卻言尙比前年好。出門入門仰視天。赤氣昏昏人擾擾。老夫猶足辦三餐。鄰里何由同一飽。

戲題併序

京師中秋節。多以泥搏兔形。衣冠踞坐如人狀。兒女祀而拜之。偶題一詩。時崇禎庚午歲也。

布席陳瓜果。儼然東郭魏。向來聞擣藥。此日竟爲神。狡計懷三窟。清光借一輪。韓盧休側目。長近月中人。

塞下曲二首

關前衰草冷煙迷。關內驕驄十萬蹄。且喜年來邊塞近。紅閨不用夢遼西。

渡黃河作

黃河天上來。其源吾不知。東南會大海。吾亦未見之。但觀孟津口。洶湧已若斯。放眼三十里。日耀光琉璃。自我出門遊。所見無此奇。中流鼓長舵。興逸不可羈。安得水仙術。長嘯呼馮夷。赤腳踏鼉鼉。揮策驅蛟螭。徑乘桃花水。東海尋安期。不然泝流上。喚取赤鯉騎。五城十二樓。直上崑崙嬉。攀花弄珠樹。漱液酌玉池。羣仙相招邀。天外飄雲旗。俯視見此水。九折如盤絲。惜哉兩不遂。書劍方奔馳。盤渦呼邪許。託命於篙師。九歌河伯篇。慷慨吟楚詞。危帆飄一葉。此去當依誰。

編主五雲王

編初成集書叢

種一他其及鈔合詩堂草山鎌

中華民國二十六年三月初版

發行所

商務印書館
上海及各埠

印刷所

商務印書館
上海河南路

發行人

王雲五
上海河南路



☆E五三四四

嚴

(本書校對者龍旭光
劉培慧)

國家圖書館



002570840

